



EDITORIAL

Batukan ang anti-komunistang pagpamig-ot

Direktang kasumpay sa pagbalaod sa Anti-Terrorism Law (ATL) ang kansamtagang ginapatuman nga kampanya sa anti-komunistang kabangis nga nagabiktima sa progresibo ug demokratikong organisasyon ug kalihukan ug nanghulga sa mga aktibista, mga artista, magbabalaod ug bisan mga lokal nga upisyal sa gubyerno.

Ginawarawara sa nahitaas nga upisyal ang ilang bag-ong dugang nga pasistang gahum sa tinguhang sumpuon ang mga demokratikong katungod ug pukanon ang mga pwersang nagasukol sa nagharing rehimens. Usa ka hugaw nga taktika ang anti-komunistang pagpamig-ot sa rehimens nga daw tuko nga mikayot sa poder. Direktang ginalambigit ang mga ligal nga demokratikong pwersa sa rebolusyonaryong armadong kalihukan.

Ilalum sa pasistang teroristang rehimeng Duterte, mikusog ang buot sa mga pasistang heneral nga mangdigwa og hilo ug bakak batok sa mga ligal ug demokratikong

pwersa ug batok sa rebolusyonaryong kalihukan. Gunit ang ATL, laraw nilang gamiton ang tibuok kabangis sa teroristang estado aron hingpit nga pukanon ang ligal nga demokratikong kalihukan nga kanhi nang nagsilbing kota sa militanteng pagsukol sa katawhang Pilipino.

Iligalisasyon sa maong mga progresibong organisasyon ang labing tumong sa maong mga lakang sa National Task Force to End Local Communist Armed Conflict (NTFELCAC) ug AFP. Gusto niining sublion ang gihimo sa balaod militar ni Marcos niadtong 1972 nga idek-

"Batukan...," sundan sa pahina 2

Lunod-patay nga yunit militar, giambus sa BHB-Surigao

MALAMPUSON NGA GIAMBUS sa Bagong Hukbong Bayan-Surigao del Sur (BHB-SDS) ang mga pwersa sa 3rd Special Forces Battalion sa Km. 14, Barangay Diatagon, Lianga, Surigao del Sur niadtong Oktubre 31. Tulo ka sundalo ang nasamdan. Nakasakmit ang mga Pulang manggugubat og tulo ka M16, mga ammunition vest ug bala, matud sa taho ni Ka Sandara Sidlakan, tigpama-ba sa BHB-SDS.

Niadong Oktubre 28, gida-kop sa usa pa ka yunit sa BHB-SDS sila PFC Raymond T. Tajone-ra sa 26th IB ug ang usa ka aset sa militar nga naila lamang isip Quiñonez sa lungsod sa San Miguel. Matud sa pasiunang taho,

"Lunod...," sundi sa panid 3

Iarang iligal ang tanang porma sa organisasyong masa. Ginagamit karon sa NTF-ELCAC ang ATL aron pagwasong lehitimo ug ligal ang anti-demokratikong mga lakang nii-ni.

Apan imbes nga pormal nga magpasaka og kaso aron ilambigit sa "terorismo" ang maong mga organisasyon, sama sa nakasulat sa ATL, ginapaagi sa NTF-ELCAC sa pang-publikong paglambigit aron pig-uton ang mga ligal ug demokratikong pwersa. Gawas sa pamulong sa usa ka walay kredibilidad nga "saksi," walay mapakitang ebidensya ang NTF-ELCAC sa akusasyon batok sa mga ligal nga nasudnon demokratikong organisasyon nga "prente" sa PKP ug "rekruter" sa BHB.

Gipalapad sa AFP ug sa NTF-ELCAC ang langkob sa "kontra-insurhensiya" aron targeton sa pagpanumpo bisan ang mga pwersang dili armado. Ang gipasubsub nga anti-komunistang pagpamig-ot kabahin sa bangis nga kampanya batok sa mga pwersang progresibo ug ligal, lakip ang sunud-sunod nga pag-

pamatay sa mga lider masa ug aktibista. Sa milabayng Oktubre lamang, dili moubos sa walo ka aktibista ang giaresto.

Aron hatagag-rason ang "kontra-insurhensiya" ug gamiton ang "anti-terorismo" batok sa rebolusyonaryong kalihukan, ginapalubog sa AFP ug NTF-ELCAC ang dakung kalainan sa komunismo ug terorismo, sa pagsulay nga tabunan ang pagkamakatarunganon sa rebolusyonaryong pakigbisog ug pag-armas, ilabina atubangan sa tiranya. Ang terorismo, o ang paggamit sa kabangis batok sa mga sibilyan o sa wala nalakip sa armadong panagbangi, sukwahi sa mga internasyunal nga balaod sa gubat. Usa kini ka krimen nga hugot nga ginasupak sa Partido.

Sa paglambigit sa Partido sa "terorismo," pugos nga ginatabunan sa NTF-ELCAC ang posisyon nga nakkigubat ang Partido ug BHB ug ang hugot nga pagtuman sa mga rebolusyonaryong armadong pwersa sa mga basihan sa tawhanong katungod ug lagda sa gubat ug makitawanong balaod. Ginagamit ang pag-

tawag nga "terorista" batok sa Partido aron hatagag-rason ang pagtagpos sa panaghisgot kalinaw ug ang paglunsad sa walay-puas, hugaw, gasto ug puno sa korapsyon nga gubat.

Imbes nga mahadlok ug mapukan sa anti-komunistang pagpamig-ot, labaw nga midaghan ang mga sektor nga mibarog ug misukol batok sa NTF-ELCAC ug sa pasismo sa rehimeng Duterte. Samtang labaw pang ginapagrabe ang anti-komunistang pagpamig-ot sa mga demokratiko ug progresibong pwersa ug ang pagsumbo sa mga demokratikong katungod, labaw nga ginapaypayan ang kasuko sa katawhan. Nangapukaw bisan ang lain-laing mga personahe ug upisyal nga mibarog ug mitingog batok sa pagpamig-ot sa AFP ug NTF-ELCAC sa mga nasudnon-demokratikong pwersa.

Kinahanglang kusganong batukan ug pakyason sa mga demokratikong pwersa ang NTF-ELCAC ug ang anti-komunistang pagpamig-ot niini. Kinahanglang tibuok-kusog nilang iduso ang ilang ligalidad ug ang garantisadong mga burges-demokratikong katungod ilalum sa konstitusyong 1987. Angayang ipakita sa kadalanan ang protesta ug pagsupak sa walay-pugong nga pagpangatake sa pasistang rehimien.

Hustong batikuson ug tul-iron ang "red-tagging" sa AFP ug iduso nga "ang aktibismo dili terorismo." Kinahanglan usab nga ipahibalo sa tanan nga dili usab terorismo ang pag-armas, ang pagsubay sa dalan ni Bonifacio ug Sakay, ang pagpaasdang sa rebolusyonaryong kausaban ug paglunsad og gubat alang sa nasudnon pagpalingkawas. Nga ang armadong pakigbisog usa ka dili mahikaw nga katungod sa mga dinaugdaug ug ginailang husto ug makatarunganon gikan pa sa unang panahon. Nga ilalum sa sistemang monopolizado sa pipila ang poder, walay laing mas epektibong pamaagi alang sa kabus ug walay gahum kundili ang mogunit og armas aron manalipod ug ipakigbisog ang ilang interes ug kaayuhan. Nga ang gubat

ANG Bayan

Bolyum LI Ihap. 21 | Nobyembre 7, 2020

Ang Ang Bayan ginapagawas sa pinulongang Pilipino, Bisaya, Iloco, Hiligaynon, Waray ug Ingles.

Nagadawat ang Ang Bayan og mga kontribusyon sa porma sa mga artikulo ug balita. Ginaawhag usab ang mga tigbasa nga magpadangat og mga puna ug rekomen dasyon sa pagpalambo sa atong mantalaan..

 instagram.com/prwcnewsroom

 [@prwc_info](https://twitter.com/@prwc_info)

 cppinformationbureau@gmail.com

Unod

Editoryal: Batukan ang anti-komunistang pagpamig-ot	1
Lunod-patay nga yunit militar, giambas sa BHB	1
Mga abuso sa FMO sa Surigao	3
Mga biktim sa red-tagging, giaresto	4
Mga kaso batok sa mga aktibista, gibasura	4
Korte, gibasura ang petisyon sa SMI	4
Ang pasistang troll nga si Parlade	5
Superbagyong Rolly, mihampak	6
Mga kampanya sa PKM	6
Mini nga pagpalingkawas sa Marawi	7
Pagpangdaogaog sa mga Moro	7
Sa mubo nga pagkasulti	8
Rebolusyonaryong pag-atubang sa MHP	9
Trump, duol na mapildi sa eleksyon	10
Partidong anti-US, midaog sa Bolivia	10

Ang Ang Bayan ginamantala duha ka hugna matag bulan sa Komite Sentral sa Partido Komunista ng Pilipinas

"Batukan....," gikan sa panid 2

sa katawhan nga ginaasdang sa BHB alang sa nasudnong kagawasan ug katilingbanong hustisa makatarunganon atubangan sa pagtraydor sa kagawasan ug pagpangdaugdaug sa naghring mga reaksyunaryong hut-on.

Sa pagpamig-ot sa mga demokratikong pwersa ug pagsigpit sa oportunidad alang sa demokratikong pagpadayag, labaw nga miigting ang pagkamakatarunganon sa armadong pakibisog isip pamaagi sa pagpanalipod sa katawhan batok sa teroristang pagpanumpo sa tiranikong rehim. Samtang nagkadaghan ang kaso sa ekstrahudisyal nga pagpamatay, mga dili makatarunganong mga pag-aresto ug pagreso, ug labaw nga migrabe ang pag-atake sa pasistang rehim sa mga katungod ug paghikaw sa oportunidad para sa kagawasan mag-organisa ug magpadayag, si Duterte na mismo ang nagtukmod sa kadaghan nga mosubay sa dalan sa armadong pakibisog.

Kinahanglang sakmiton sa BHB ang paborableng katilingbanon ug pulitikanhong kahimtang aron magpakusog ug magpalapad sa han-ay. Kinahanglang pakusgon ang pagpangrekrut sa mga bag-ong Pulang manggugubat gikan sa han-ay sa mga mamumuo, mga intelektwal, empleyado ug uban pang mga sektor sa kasyudaran, samtang padayon ang pagpangrekrut sa masa sa kabanikanhan. Kinahanglang padayon nga padaghanon sa BHB ang mga taktikal nga opensiba ug padayon nga palapdon ug pasubsubon ang gerilyang pakiggubat sa tibuok nasud.

Kinahanglang labaw pang pasubsubon ang mga taktikal nga opensiba isip tubag sa ginapangayong hustisa sa masang biktim sa mga pasistang teroristang yunit sa AFP. Kinahanglan usab nga pasubsubon ang mga taktikal nga opensiba aron bintan ang pwersa sa AFP ug aron dili makakonsentra sa pagsumpo sa mga progresibong pwersa sa kasyudaran. Ang mga balita sa mga kadaugan sa BHB naghatag og inspirasyon ug determinasyon sa pagsukol sa mga demokratikong pwersa aron suklan ug tapuson ang pasistang tiranya ni Duterte. AB

"Lunod....," gikan sa panid 1

tim lider sa usa ka yunit sa CAFGU Active Auxiliary (CAA) si Tajonera ug nagsisilbi silang gwardya sa minahan nga gipanag-iyahan sa bandidong si Jasmine Acevedo. Tumong sa maong tim nga siguruhon ang bahin sa kumander sa 26th IB sa produkto sa mina.

Camarines Sur. Gitaho sa BHB-West Camarines Sur ang ambus sa mga Pulang manggugubat sa miatakeng mga tropa sa 9th IB niadtong Oktubre 22 sa Barangay Tible, lungsod ng Lupi, Camarines Sur. Nakakumpiska ang BHB og duha ka pusil ug 15 bakpak nga adunay mga lain-laing gamit militar.

Capiz. Gipabusikaran sa BHB-Central Panay niadtong Oktubre 22 sa alas-4 sa hapon ang mga elemento sa 12th IB sa Barangay Nayawan, Tapaz. Usa ka sundalo ang patay ug upat ang samaron. Nagsabwag ang maong yunit og teror sa mga lungsod sa Capiz ug Iloilo sa takuban sa Re-tooled Community Support Program

Negros Occidental. Naglunsad ang BHB-Negros og duha ka magkasunod nga taktikal nga opensiba batok sa nag-operasyong tropa sa 62nd IB sa Barangay Sandaya, Guihulngan City niadtong Nobyembre 4. Unang giambus ang mga sundalo sa Sityo Inangaw sa alas-3 sa hapon kasunod ang sa Sityo Matal-e sa alas-7 sa hapon. Duha ka sundalo ang napatay ug daghan ang nasamdan.

Isip balos, gipatay sa mga sundalo ang maguumang si Reo Jacaba, residente sa kasikbit nga barangay sa Macagahay sa Moises Padilla og ginapagawas nga myembro sa BHB. AB

Grabe nga pagpanglapas, kaluha sa FMO sa Surigao del Sur

Kaluha sa focused military operation (FMO) sa mga yunit militar ilalum sa 4th ID ang lain-laing pagpangatake sa mga Lumad ug mag-uuma sa Surigao del Sur. Nanghuramentado ang mga elemento niini, ilabina human maambusan sa mga Pulang manggugubat ang ilang han-ay.

Niadtong Oktubre 3, tulo ka mag-uuma ang gipatay sa mga pwersa sa 36th IB ug gipagawas nga mga myembro sa Bagong Hukbong Bayan (BHB) sa Tandag City. Tadtad sa bala ang lawas nilang Maco Cagaran Maitom, 50, Freddie Miyarez Zamora, 42 ug Paulino Perez Maitom Jr., 23, parehong mga residente sa Barangay Pangi sa maong syudad.

Balos kini sa 36th IB human ma-

kaengkwentro ang usa ka yunit sa BHB sa bukirong bahin sa syudad. Nag-uma kanhi layo sa lugar sa engkwentro ang tulo ka biktima dihang nakit-an ug gipatay sila sa mga sundalo.

Sa San Agustin, giistraping sa mga elemento sa 3rd Special Forces Battalion ang mga balay sa Sityo Magkahunaw, Buhisan niadtong Oktubre 28. Duha ka bata ang hapit maigo sa bala.

Niadtong Oktubre 27, lima ka oras nga gibomba sa 4th ID ang bukirong bahin sa lungsod sa Marihatag duul sa mga komunidad sa Sityo Magkahunaw, Barangay Buhisan, San Agustin; Km. 16 ug Han-ayan sa Diatagon. Migamit og mga helikopter ug drone ang mga sundalo. Tunog niini, mibakwit ang mga residente gikan sa maong mga komunidad. Naguba sa pagpamomba ang mga kahoy ug uban pang bahandi sa lasang nga lakip sa tinubdan sa pagkaon ug panginabuhian sa mga Lumad. Ikalima nga insidente na kini nga pagpamomba sa prubinsya gikan Mayo. AB

8 ka biktima sa red-tagging, giaresto

Walo ka aktibistang myembro sa mga organisasyon nga malisyosong ginalambigit sa National Task Force to End Local Communist Armed Conflict sa armadong rebolusyonaryong kalihukan ang magkasunod nga giaresto sa mga elemento sa estado niadtong ulahing semana sa Oktubre.

Giaresto sa mga operatiba sa Special Action Force ug 503rd IBde ang lider-kababayen-an nga si Beatrice Belen sa iyang balay sa Barangay Uma, Lubuagan, Kalinga, alas-4 sa kaadlawon niadtong Oktubre 25. Si Belen usa ka Igorot nga myembro sa Advisory Council sa lokal nga balangay sa Innabuyog sa Kalinga. Myembrong organisasyon sa Gabriela ang Innabuyog.

Giutingkay sa mga operatiba ang balay ni Belen ug gitamnan og mga pusil ug bomba aron hataggrason ang pag-aresto. Kasamtangan siyang nakadetine sa Tabuk City Jail. Matud sa Cordillera Human Rights Alliance, unang gipreso si Belen sa usa ka selda kauban sa mga lalaking detinido. Giakusahan siyang kauban sa mga Pulang manggugubat nga nangreyd kuno sa detatsment sa CAFGU sa maong barangay niadtong.

tong 2018.

Sa susamang adlaw, lima ka mag-uuma nga myembro sa Pawis, myembrong organisasyon sa Masi-pag nga nagasalmot sa kampanyang bungkalan sa Kilusang Magbubukid ng Pilipinas (KMP), ang giaresto sa mga pulis sa Barangay San Juan, Binangalan, Negros Occidental. Lakip sila sa 56 nga myembro sa Pawis nga gipaaresto ni Bacolod RTC Branch 54 Judge Eduardo Sayson tungod kay ginabungkal nila ang bahin sa 1000-ektaryang lupang ginaangkon sa agalong yutaan nga pamilyang Yusay. Upat sa adunay mandamyento ang dugay nang patay. Matud sa Pawis, laraw lamang sa maong mga lakang nga sumpuon ang ilang kampanya alang sa hingpit nga pag-apud-apud sa yuta.

Duha ka adlaw ayha niini, sa alas-4 sa kaadlawon, giaresto usab

sa militar ug mga pulis ang mag-uuumang si Danilo Tabuno sa iyang balay sa Barangay Sula, San Jose, Tarlac. Myembro si Tabuno sa Alyansa ng Magbubukid sa Gitnang Luzon, balangay sa KMP sa rehiyon. Giutingkay ang iyang balay ug gitamnan sa mga ebidensyang pusil, bala ug pekeng mga sulat sa ekstorsyon. Temporaryong nakagawas si Tabuno human magpyansa og ₱100,000.

Sa Bulacan, nataho niadtong Oktubre 29 nga gidala sa duha ka kampo militar ang estudyanteng aktibistang si Irix Romero sa iyang mga paryente nga adunay kalambigitan sa militar. Pugos siya nga gitukyog sa Camp Aguinaldo sa Quezon City aron interogahon. Human niini, gidala siya sa kampo sa militar sa Clark, Pampanga. Tin-aw nga laraw niining hadlukon siya ug ang pareho niyang mga aktibistang estudyante. Myembro si Romero sa Student Christian Movement of the Philippines sa Bulacan State University.

AB

Mga kasong batok sa mga aktibista, gibasura

GIBASURA NIADTONG OKTUBRE 15 sa Department of Justice (DOJ) ang kasong *kidnapping* batok nilang Kabataan Partylist Rep. Sarah Elago, Bayan Muna tsirman Neri Colmenares, Jose Maria Sison ug siyam pang lider sa Anakbayan. Gipasaka sa mga pulis ug ni Relissa Lucena, sa sulsul sa National Task Force to End Local Communist Armed Conflict, ang kasong naglambigit sa pagrekut kuno sa mga nahigutinan sa kabatan-onan aron mahimong myembro sa Bagong Hukbong Bayan. Matud sa DOJ, walay igong ebidensyang nagpamatuod nga na-kidnap ang 19-anyos nga anak ni Lucena nga si Alicia ug nga girekrut siya sa armadong kalihukan.

Sa Iloilo City, gibasura usab niadtong Oktubre 19 ang tulo sa upat ka kasong kriminal nga gipasaka sa pulisia batok sa 42 ka aktibista niadtong Mayo tungod sa kakulang sa ebidensya. Gikasuhan sila og illegal assembly ug duha pang kasong kalabot sa paglapas sa *lockdown* tungod kay nagrali sila niadtong Mayo 1. Nananwagan sila kaniadto og hustisa alang sa gipatay nga lider masa nga si Jory Porquia.



Korte, gibasura ang petisyon sa SMI

GIBASURA SA LOKAL nga korte sa South Cotabato niadtong Oktubre 12 ang petisyon sa Sagittarius Mines, Incorporated (SMI) nga iatras ang lokal nga balaod nga nagabawal sa *open-pit mining* sa prubinsya. Gihikyad sa kumpanya ang petisyon kalabot sa plano niining subling ablihan ang Tampakan Gold-Copper Project (TGCP).

Ayha niini, nagpagawas niadtong Setyembre 19 si Gen. Allen Capuyan, lider sa National Commission on Indigenous Peoples (NCIP) og sertipikasyong nagatugot sa maong operasyon. Luyo sa desisyon sa korte, nagpahigayon pagihapon og seremonya niadtong Oktubre 28 ang NCIP sa Barangay Danlag sa Tampakan aron pasinayaan ang kaugalingon niining sertipikasyon. Gikundena sa lain-laing organisasyon sa nasudnong minorya ang maong desisyon sa NCIP. Gitawag nilang "bugaw" ang ahensya tungod sa pagbaligya niini sa mga yutang kabilin sa mga kapitalista.

Ang pasistang *troll* nga si Parlade

Ayha nabantog nga notoryus nga *red-tagger* ni Angel Locsin, naila si Antonio Parlade isip kontra-kalinaw nga tigpamaba sa Philippine Army nga gisipa sa pwesto niadtong 2011. Gikontra niya kanhi ang upisyal nga deklarasyon sa gubyerno dihang manawagan siya nga isuspinde ang hunong-buto sa gubyerno sa Moro Islamic Liberation Front (MILF). Gimakmak usab niya ang gimando sa korte nga pagpagawas sa mga aktibistang panglawas nga naila isip Morong 43.

Human gisipa sa pwesto, gibutang siya sa usa ka "suportang yunit" sa hedkwarters sa Armed Forces of the Philippines (AFP). Gi-padala siya sa US aron mag-eskwela sa mga eskwelahang pangmilitar sa usa ka panahon. Niadtong 2018, nagsilbi siyang kumander sa 203rd IBde sa isla sa Mindoro. Ayha mahuman ang tuig, mitaas ang iyang ranggo ngadto sa *deputy chief-of-staff for operations* o J3.

Nahimong deputy chief siya sa Civil-Military Operations o J7 niadtong 2019. Isip usa sa labing panatikong pasista, gikuyog siya sa gru-pong misuroy sa Europe aron dauton ang mga organisasyon sama sa Rural Missionaries of the Philippines ug Ibon Foundation ug malisyonong ilambigit kini sa Bagong Hukbong Bayan. Hugot nga gisalikway sa mga European ang ilang mga bakak.

Walay hunong si Parlade sa pagpapamakak kalabot sa pagpatay kuno sa Partido Komunista ng Pilipinas ug Bagong Hukbong Bayan sa kaugalingon niining mga myembro aron tabunan ang pagpamatay sa estado sa mga prominenteng aktibista sama nila ni Randy Malayao ug Randy Echanis. Wala siya'y ulaw sa pagsulting angayan lamang nga ginapatay ang mga tigpanalipod sa tawhanong katungod sama ni Zara Alvarez tungod kay "mga NPA man usab kini," matud niya.

Isip *troll*, nagpakaylap si Parlade og mga pagpangdaut, pagpangtamay ug walay basehan nga mga akusasyon nga ginabalik-balik sa *social media* ug ginahimuhiman og mga pekeng pamahayag, bidyo ug deklarasyon. Gipalakpakan ug gipakaylap ang iyang anti-komunistang pamahayag sa mga upisyal ug su-

portadong *account* sa militar ug pulis, ingonman sa milyong bayaramg *troll* sa estado.

Bugti sa gipakita niyang kadasig isip *troll*, nahimong "yaweng upisyal" siya sa National Task Force to End Local Communist Armed Conflict ug dili madugay gituboy isip tigpamaba niini.

Niadtong Enero 17, gipulihan niya si Gilbert Gapay isip kumander sa AFP Southern Luzon Command (Solcom) nga milangkob sa Bicol ug Southern Tagalog. Nahimong hepe sa Philippine Army si Gapay niadtong Disyembre 2019, ug sa kadugayan nahimong AFP chief of staff niadtong Agosto 3. Nagpaduol si Parlade sa pinakapasistang mga upisyal militar kay gusto niya nga sundan ang tunob ni Gapay.

Dili sama sa ubang *troll* ni Duterte, anaa sa kontrol ni Parlade ang duha ka dibisyong pangkati, mga pwersang nabal ug pangkahanganin nga walay pugong nga nagpatuman sa terorismo sa estado. Ilalum sa iyang kumand, labaw pa sa *red-tagging* ang ginahimo sa mga yunit militar sa mga aktibista, tigpanalipod sa tawhanong katungod, midya, maguumma ug bisan mga myembro sa hukidatura. Walay hunong ang ilang mga krimen ug paglapas sa tawhanong katungod sa katawhan, kaabag ang pulisa.

Dili moubos sa 190 sa Bicol ug 1,357 sa Calabarzon ang nataho sa Ang Bayan nga biktima sa paglapas sa tawhanong katungod gikan Enero hangtud Oktubre 31. Kadaghanan niini binuhatan sa mga yunit sa Solcom. Gilangkuban kini sa mga ekstrahudisyal nga pagpamatay (25 biktima), dili makatarunganong pag-



aresto ug detensyon (147), pagpamugos (16), pagpangdaut og kabtaganan (5), blokeyo sa pagkaon ug ekonomiya (1200), iligal nga pagpangranksak ug pagpangumpiska (41), pisikal nga pagpangatake (13), pagpanghulga, pagpamig-ot ug pagpanghadlok (91), ug uban pa. Mayorya sa mga biktima mga mag-uuma ug mamumuong giakusahang myembro sa BHB.

Lakip sa mga kasos ang dili makatarunganong pag-aresto sa upat ka progresibong lider sa Bicol.

Niadtong Oktubre 20, gisulayan og patay sa nakamotorsiklong kriminal ang huwes nga si Jeaneth Gaminde San Joaquin sa Camarines Sur, kauban ang iyang istap. Gibuhian ni San Joaquin ang aktibistang si Jenelyn Caballero, pipila ka adlaw human niyang mag-isyu og mandamamento de arresto, tungod kay dili lig-on ang kasos sa militar. Sa iyang gihamo, gikontra niya si Parlade nga dugay nang nasuko sa mga huwes nga nagahatag og lugar sa mga demokratikong katungod sa mga aktibista.

Niadtong Abril, gipresenta sa mga yunit sa Solcom ug mga pulis ang 16 nga mga "surenderi sa BHB" nga sa tinuod mga mamumuo sa planta sa Coca-Cola sa Laguna.

Sa Quezon, gisulayan og patay sa mga ahente sa militar ang pangkinatibuk-ang kalihim sa Karapatan sa prubinsya nga si Genelyn Dichoso

"Ang pasistang...," sundi sa panid 6

Superbagyong Rolly, migun-ob sa Southern Luzon

NAGBILIN OG LABING kadaut sa Southern Luzon ang Superbagyong Rolly (Goni) human kinining mihampak sa Bicol ug Southern Tagalog niadtong Nobyembre 1. Ginaila ang bagyong Rolly isip pinakakusog nga bagyong miigo karong tuiga. Pinakagrabe ang kadaut sa Bicol.

Nagresulta ang bagyo sa mga pagdahili sa yuta, pagbaha ug pagkugba sa kabitangan. Liboang ektarya sa mga pananum ug pangisdaan ang naguba. Napuloan ka libong kabalyan usab ang naguba, lakin ang kapin 100 ka balay sa Guinobatan, Albay nga natabunan sa lahar ug lapok tungod sa walay hunong nga pagkwari sa tiilan sa Mt. Mayon. Sa Virac, Catanduanes, naguba usab ang 10,000 ka balay sa mga baybay. Bisan ang mga negosyo ug panginabuhian sa mga syudad ug sentrong lungsod nga grabeng naapektuhan. Gikabalak-ang mas daghan pa kaysa sa gitaho sa gubyerno nga 28 ang namatay.

Pinakagrabe sa mga nadautan ang mga mag-uuma ug mangingisa nga kanhi nang naglisud sa nagkalaygay nga panginabuhian ug pagpasagad sa nagharing gubyerno. Wala pa nakabawi ang mga mag-uuma sa kalubihan sa Southern Luzon gikan sa milabayng mga bagyo. Du-gang paantus usab ang bagyo sa mga lugar nga nakasinati na sa mga pagpamig-ot sa panginabuhian tungod sa okupasyon sa militar.

Dih-a-dih-a nga gipalihok sa Partido Komunista ng Pilipinas ang tanang rebolusyonaryong pwersa sa Southern Luzon alang sa malukpanong mobilisasyon aron tabangan

ang mga biktima sa sunud-sunod nga bagyo. Gimandoan usab ang Bagong Hukbong Bayan nga makigordina sa mga rebolusyonaryong organisasyon masa aron subling tukuron ang mga balay ug istruktura sa komunidad.

Taliwala niining tanan, wala na-kit-an bisan anino ni Rodrigo Duterte aron pangulohan ang pagtubag sa kalamidad. Bisan ang iyang gabinete nagpulong lang kung kanus-a grabe na nga nakapangun-ob ang bagyo.

Sa Bacoor, Cavite, kapin 400 ka pamilya ang nawad-an og puloy-anan atol sa bagyo tungod sa pagkasunog sa ilang mga komunidad. Matud sa Pamalakaya, tinuyong gisunog ang kabalyan sa mga barangay sa Alima ug Barangay Sineguelasan aron hatagang-dalan ang reklamasyon sa Manila Bay. AB

"Ang pasistang..., " gikan sa panid 5

niadtong Hunyo 1.

Sa Laguna, duha ka mag-uuma ang gipatay sa mga pwersa sa Solcom niadtong Enero. Sa Masbate ug Albay, gipatay sa mga sundalo sa Solcom ang upat ka upisyal sa barangay ug usa ka komersyante sa bugas niadtong Setyembre.

Nakarekord ang Ang Bayan og 331 ka operasyong "kontra-insurhensiya" nga gihimo sa mga yunit sa utos ni Parlade gikan Enero hangtud Oktubre. Langkob sa maong mga operasyon ang 163 ka barangay sa 46 ka lungsod sa Bicol; ug 128 ka barangay sa 31 ka lungsod sa Southern Tagalog.

Lakip dinihi ang paturagas nga pagpamusil sa 49th IB duul sa usa ka eskwelahan sa Barangay Oma-oma, Ligao City, Albay niadtong Setyembre 25. Nagresulta kini sa pagbakwit sa mga magtutudlo nga nangandam unta alang sa pag-abli sa klase.

Gilapas ni Parlade bisan ang kaugalingong hunong-buto nga gideklara ni Rodrigo Duterte gikan Marso 19 hangtud Abril 30. Pinakadaghan ang mga operasyong kombat ug sikolohikal sa Southern Tagalog (138) ug Bicol (94) sa maong panahon. Lakip dinihi ang sunud-sunod nga pagpangatake sa mga pwersa sa Solcom sa mga yunit sa BHB sa Barangay Puray, Rodriguez, Rizal, ug sa Mulanay ug Gumaca, Quezon gikan Marso 28 hangtud Abril 1. AB

Mga balangay sa PKM, kolektibong giatubang ang pandemya

PAGSANDIG SA KOLEKTIBONG kusog ang gipakita sa mga myembro sa Pambansang Katipunan ng mga Magbubukid (PKM) aron malapasan ang krisis ug gutom nga gibunga sa pandemyang Covid-19.

Sa Northern Samar, 30-40 ka sako sa bugas ang gibanabang giani sa mga myembro sa PKM sa kolektibong pagtanum niadtong Setyembre. Nakaani usab ang mga mag-uuma og kamote ug utan sama sa kalabasa, ampalaya ug okra.

Kaabag ang Bagong Hukbong Bayan, gihawan ug gitamnan sa mga mag-uuma ang nakumpiskang yuta sa usa ka agalong yutaan sa ilang lugar. Sa kasikbit nga klaster, subling gitukod ang tindahan sa kooperatiba sa usa ka balangay.

Nauna na nga gipakita sa mga mag-uuma sa PKM sa Eastern Visayas ang ilang panaghiusa niadtong Mayo dihang gihampak sila sa bagyong Ambo. Treyntay sais ka balay ang dungan-dungan nga gitukod ug giayo sa mga balangay sa PKM sa rehiyon.

Sa maong panahon, pipila ka grupo sa pagtinabangay (hunglos) sa PKM sa Bicol ang naglunsad sa kolektibong pagtanum og pagkaon alang sa konsumo sa mga pamilya ug kasikbit nga baryo.

Nagpahigayon usab og kumperensya ang PKM ug Rebolusyonaryong Organisasyon Ayta sa Zambales Mountain Range niadtong Setyembre. Gihugpong sa kumperensya ang masang minorya ug mag-uuma aron pakyason ang proyektong National Greening Program sa Department of Environment and Natural Resources ug aron ipadayong bungkalin ang ilang yuta.

Mini ang pagpalingkawas sa Marawi

Walay hinungdan aron saulugon ang ikatulo nga tuig sa ginaingong "pagpalingkawas sa Marawi." Kini ang pamahayag sa mga Moro sa gihimong pagdum-dum sa rehimeng Duterte sa okasyon niadtong Oktubre 17. Nag-antus pa gihapon ang mga napalayas nga Moro nga wala pa nakabalik hangtud karon sa syudad.

"Wala namo nabati nga gawas-non na mi tungod kay hangtud karon wala pa gihapon mi gitugutan nga makabalik sa among mga balay ug komunidad," matud kang Drieza Lininding, lider sa Moro Consensus Group. Matud sa pinakaulahing taho sa United Nations High Commissioner for Refugees, gibanabanang 126,775 ka residente pa gihapon ang nagpabiling anaa sa mga sentro sa ebakwasyon ug nanginahanhanglan og proteksyon ug suporta taliwala sa pandemya.

Nag-unang problemang gikaatubang sa mga bakwit ang kawad-on sa suplay sa tubig nga batakang pangihanglan sa pagmantine sa kallimpyo. Wala usay mga klinika ug tinubdan sa libre o baratong tambal sa maong mga sentro. Halos tanan kanila ang walay trabaho ug nagsalig lang sa limitadong ayuda gikan sa mga matinabangong institusyon. Liboan ka Maranao pa gihapon ang kasamtangang nagpuyo sa ilang mga paryente sa mga kasikbit nga prubinsya ug bisan sa lain-laing bahin sa nasud.

Dakung pangutana para sa mga residente kung asa na napadulong ang halos ₱70 bilyong gigahin sa rehimeng alang sa rekonstruksyon sa Marawi ug kapin ₱40-bilyong pautang ug ayudang nadawat niini gikan sa lain-laing mga nasud sukad 2017. Labaw pang nabutyag ang pagpasagad sa rehimeng ug pagpadaplin niini sa panawagan sa mga bakwit nga makauli sa ilang mga komunidad sa taho nga gipagawas sa Bangsamoro Transition Authority niadtong Agosto 26. Nahikayad dinihi nga wala pa gihapon miuswag ang planong relaksyon sa rehimeng. Wala pa gihapon gitukod ang mga balay sa residente

ug wala pa gihapon silay nadawat nga unsamang

kumpensasyon alang sa naguba nilang mga kabtangan. Nagpabiling putol ang linya sa kuryente ug patubig sa 24 ka barangay sa syudad nga gipulbos ug walay pagtagad nga gibomba sa militar. Wala pay natukod nga mga eskwelahan sa lugar, ug wala pa gihapoy komprehensibong programa alang sa panginabuhian sa mga bakwit.

Giuna sa rehimeng ang pagtukod sa sistema sa kalsada sa syudad imbes nga tubagon ang mga nahisugtang problema. Lakip sa mga gipanghinambog niini ang pagtukod sa gitawag og Marawi Transcentral Road, usa ka projekto ilalum sa engrandeng programang Build, Build, Build ni Duterte. Gipondohan kini gamit ang ₱970-milyong utang



gikan sa Japan International Cooperation Agency. Gawas dinihi, ginasipasaran usab sa rehimeng ang pagtukod sa ₱400-milyon nga bag-ong kampo-militar sa Barangay Kaptaran nga kanhing nahimutangan sa municipal hall sa Marawi. Ang pagbubu og pondo alang sa maong mga proyekto usa ka daku kaayong insulto sa mga Maranao nga padayong ginahikawan sa ilang katungod sa pabalay ug disenteng kinabuhi.

"Ginalangkuban ang Marawi sa mga residente, dili sa mga building," paghatag-duut ni Lininding. Matud niya, makawang lamang ang tanang gihimo sa rehimeng kung dili niini hatagag pagtagad ang hinanali nga panawagan sa mga Maranao nga makabalik sa ilang mga komunidad. **AB**

Bag-ong yugto sa pagpangdaogdaog sa mga Moro

NAG-ATUBANG sa bag-ong yugto sa nasudnong pagpangdaogdaog ang katawhang Moro ilalum sa Anti-Terror Law sa rehimeng Duterte. Usa ka adlaw pa lamang human gipagawas sa Department of Justice ang Implementig Rules and Regulations sa maong balaod, giakusahan na dayon sa pangulohan sa Armed Forces of the Philippines nga si Gen. Gilbert Gapay ang mga madrasa (eskwelahang Islamiko) nga ginamit kuno sa pagpangrekrut sa mga terorista.

Dugay nang gikabalak-an sa mga aktibistang Moro ang epekto sa ATL sa ilang mga komunidad, Niadtong Agosto 7, nagsampa sila, kauban ang ubang nasudnong minorya, og ika-16 petisyon batok niini. Subay kang Amirah Lidasan sa Moro-Christian People's Alliance, sigurado nga pagagamiton kini batok sa mga Moro nga kanhi nang gitagad isip mga terorista sa rekasyunaryong estado. Gipunting niya ng kasos sa mga Moro nga gipasanginlan niadtong dekada 2000 nga nagpahimutang kuno og mga pagpangbomba o uban pang "teroristang" lihok tungod lang kay medyo kapareho ang ilang mga ngalan sa mga ngalan sa mga myembro sa Abu Sayyaf. Wala pa nadungog ang ilang kasos sa korte ug daghan sa ilang halos duha na ka dekada nga gipriso.

P11 bilyon+


inisyal nga
banabana sa
kadaut sa
superbagyong Rolly
nga nihapak sa
Bicol niadtong
Nobyembre 1.

P3 bilyon

niini sa
sektor **sa**
agrikultura.


#NotoRedTagging #YesToRedLipStick

Kampanya sa social media nga
gipangulohan sa artista nga si **Angel Locsin** human gi-red-tag siya sa
militar. Gi-red-tag usab ang artista
nga si **Liza Soberano** ug ang beauty
queen nga si **Catriona Gray**.



Gitugutan na ang

100%



langyaw nga pagpanag-iya

sa mga **planta nga
geothermal** gamit ang
**Renewable Energy Act of
2008** ug **Public Services Act**.

₱300 M

kadaut nga dala sa mga fall armyworm

(*Spodoptera frugiperda*) sa mga
maisan sa 13 ka rehiyon. Apektado
niini ang **1.8 milyon nga
mag-uuma** sa mais.

2.5%

gitaas sa tantos sa implasyon

(gipaspason sa pagtaas
sa mga presyo sa
palaliton). Pinakapaspas
ang pagtaas sa presyo sa
pagkaon, nag-una sa
karne (4.7%) ug isda (3.7%).

99,000

ihap sa nataho nga natakdán sa Covid-19 sa US

sa adlaw sa elekson
pagkapresidente sa nasud. Kini na
ang pinakataas nga ihap sa
inadlaw-adlaw nga natakdán sa
kalibutan sa panahon sa
pandemya.



79.8%

na lamang sa gikinahanglanan nga bigas ang **kaya** **ngaprodyus** sa mga **Pilipinong mag-uuma**,

gikan sa abereyds nga **91%** sa
miaging 30 ka tuig. Epekto kini
sa **Rice Importation
Liberalization Law** nga gapatay
sa sektor sa humay

₱4.4 BILYON

pa lang ang girelis sa

₱140 BILYON

pondó nga gihatag kang **Duterte** para hinanaling makatabang sa mga **apektado sa pandemya**.

Rebolusyonaryong pag-atubang sa kabilinggan sa panghunahuna

Niadtong Oktubre, gitaho sa National Center for Mental Health ang 119% pagsaka sa ihap sa mga tawag sa "national suicide hotline" sa ahensya. Ang "hotline" usa ka numero nga pwedeng tawagan ug pangayoan og tabang sa mga indibidwal nga nakahunahunang maghi-kog. Ang pagdaghan sa mitawag dinihi timailhan sa grabeng kabalaka tungod sa mga pagpamig-ot, pagkawala sa trabaho ug kita ug dugay nga pagkatanggong sulod sa balay.

Gipatataw niini ang hisgutanan sa nagkadaghing kasu sa mga adunay problema sa panghunahuna o ang ginatawag og *mental health problem* (MHP) hinungdan sa pagsagayad sa krisis sa ekonomiya ug panginabuhian tungod sa palpak nga tubag sa gubyerno sa pandemya.

Sa han-ay sa rebolusyonaryong kalihukan, dili lang pipila ang mga indibidwal nga misampa sa lain-laing mga organisasyong masa ang nakan-sinati og MHP. Sulod sa mga rebolusyonaryong organisasyon, daghan kanila ang natabangang huptan ug patigbabawan ang ilang MHP. Usa dinihi si Sam, kanhing aktibistang estudyante nga gipiling tibuok-panahong mag-alagad sa kabanikanhan isip organisador sa mga mag-uuma.

Hayskul pa lang, nakitaan na siya og mga problema sa panghunahuna. Mitumaw kini sa mga higayong ginapasakitan niya ang iyang kaugalingon, pinaagi sa paglaslas sa kanyang braso. Sa iyang panghunahuna, gibunga kini sa pagbulag sa iyang mga ginikanan nga grabe niyang gikahinuklog. Nasuta sa duktor nga aduna siyay *bipolar disorder*, usa ka kundisyon nga nagapaling sa hilabihang kadasig ug hilabihang pagkahugno o depresyon niadtong anaa na siya sa kolehiyo. Human kini nga napugos siyang moundang sa pag-eskewela ug magtrabaho aron makatigum og kwartang panggasto sa iyang kurso. Dinihi siya unang nagsulay nga magpakamatay.

Matud kang Sam, mas nasabtan niya ang iyang gibati dihang nausab ang iyang pilosopiya ug panglantaw sa kalibutan. Daku ang natabang kaniya sa pagtuon sa Marxista-Leni-

nistang pamaagi sa panghunahuna ug makimasang barungan.

"Ayha ko naorganisa, wala may Marxismo nga naghatag pagpatin-aw sa mahitungod ako mga butang-butang. Wala koy giya kung unsaon pagtuki sa mga problema, kadtong mga primarya ug sekundarya, panggawas ug pangsulod, busa sa akong hunahuna, usa lang ko ka pasibong pyesa sa kontradiksyon nga walang laing kahibalo kundi ang kaluy-an ang kaugalingon ug kasilagan ang kalibutan."

Sa proseso sa iyang kahimtagong, nabansay ni Sam ang katakus nga ilhon ang lain-laing kontradiksyon ug mamahimong kabahin sa pagresolba niini. Gibansay niya ang

iyang kaugalingon nga mahimong obhetibo sa mga panagbangi, gi-kan sa simpleng dili pagsinabtay tali sa magkauban sa kolektiba, hangtud sa mga antagonistikong panagbangi sa hut-onog tali sa mga mag-uuma ug agalang yutaan sa paglunsad sa kalihukan masa. Nakatabang og daku sa iyang pagtuki sa mga kontradiksyon sa kau-galingon.

"Mahinungdanong masabtan kung unsa ang mga trigger ug epekto niini sa disposisyon ug lihok sa usa ka adunay ingon niining kabilinggan," matud pa kang Sam. Ang trigger ang unsamang eksternal nga butang nga mamahimong magbunga og negatibong emosyon, buut o kabalaka. Ang pag-ila sa mga trigger sa usa ka indibidwal ang unang lakang sa pagdumala niini ug yawe sa paghiyad sa mga pamaagi kung paunsa kini atubangon.

Adunay usay higayon nga napangutana kang Sam kung maka-trigger

"Rebolusyonaryong...," sundi sa parid 10



Pagpasagad sa reaksyunaryong estado sa mga adunay kabilinggan sa hunahuna

DILI LANG PIPILA ang adunay kabilinggan sa hunahuna sa Pilipinas. Matud sa usa ka sarbey sa reaksyunaryong estado niadtong 2010, usa sa matag lima ka Pilipino ang nakasinati niini. Gihikayad dinihi nga ikatulo sa pinakakomun nga kabilinggan mao ang mga problema sa hunahuna.

Sa usa pa ka sarbey nga gihimo niadtong 2016, *schizophrenia* ang nag-unang sakit sa hunahuna sa mga Pilipino. Mikabat sa 42% sa mga adunay problema ang na-diagnose niini, mayorya mga lalaki. Sa pinakabatakan, dili matandi sa mga adunay *schizophrenia* kung unsa ang tinuod ug unsa ang dili.

Atubangan niini, kulang kaayo ang rekursos sa estado aron atimanon ang mga adunay kabilinggan sa hunahuna. Aduna lamang 700 ka lisensyadong *psychiatrist* ug 1,000 *psychiatric nurse* sa tibuok nasud. Mayorya sa mga pasilidad alang sa pag-atiman sa adunay mga kabilinggan ang naa sa Metro Manila ug kadaghanan sa mga rehiyon ang walay igo o wala ni bisan unsang pasilidad. Anaa sa 5% lang sa gamayng badyet alang sa panglawas ang gigahin alang sa mental health. Ang mga adunay kakayahang nga magpatsek-ap sa duktor naglisud usab sa pagpalit sa mahal kaayo nga mga tambal.

Trump, duol na mapildi sa eleksyon sa US

HUMAN ANG UPAT ka adlaw sa pag-ihap, wala pa gihapoy nadeklarang nakadaug sa ika-46 nga eleksyon sa pagkapresidente sa US niadtong Nobyembre 3. Ginasunud-suran ni Donald Trump, kasamtangang presidente ug kandidato sa Republican Party, kang Joseph Biden sa Democratic Party. Adunay 214 botong elektoral si Trump kumpara sa 264 ni Biden. Kinahanglang maabot ni Biden ang 270 ka boto aron makadaug.

Nobyembre 4 sa kaadlawon, walay basehan nga gideklara ni Trump ang iyang pagdaug. Giduso niyang gilimbongan siya sa pipila sa mga estadong ginaila nga balwarte sa iyang partido. Nanawagan siya nga ihunong ang pag-ihap sa pipila ka lugar nga alanganin ang iyang boto, samtang giduso nga ipadayon ang pag-ihap sa lugar nga daug siya. Nanghulga siya nga magpasaka og mga kaso.

Ang gidahum nga pagkapildi ni Trump repleksyon sa disgusto sa daghang sektor sa US sa iyang palpak nga pagsumpo sa pandemyang Covid-19, ug sa iyang mga bakak, ug maki-kapitalista, rasisita ug kontra-kababayen-ang mga palisiya ug pamahayag.

Gipahigayon ang eleksyon sa US taliwala sa grabeng kahimtang sa pandemya (pinakadaghing kasu sa tibuok kalibutan), malukpanong mga protesta batok sa brutalidad sa pulis ug kabangis ug pagpangdaugdaug batok sa mga Itum, ug malukpanong disemployo ug krisis sa ekonomiya ug panginabuhian. Ang maong mga isyu ang siguradong pagaatubangon sa molingkod nga presidente sa Enero 2021.

"Rebolusyonaryong...," gikan sa panid 9

ger ba sa iya ang mga pig-ot nga kahimtang sa mga sama niyang naku-lubog sa kabanikanhan. "Syempre," ingon niya, "apan ako ning gitagad nga walay kalainan sa paningpalad sa kinabuhi sa dunot nga sistema. Ang kalainan lang kay dinihi, kabalo ko nga aduna makab-bot ang mga sakripisyos, nag-ani kita og mga ka-daugan, ug ang paglaum dili lang usa ka pulong pangahupay sa buut alang sa mga depressed kundi aktwal nga butang nga gakakita sa inadlaw-adlaw nga pakigsandurot sa masa."

"Ang kasagarang kaluha sa trigger nga angayang batukan mao ang suhetibong panghunahuna. Mga pagbat niwalay igong sukaranan ug dili sigurado kung tinuod," matud ni Sam. "Sa akong kasinatian, kung pasagdan ang suhetibismo, modaku kini ug magpatung-patong ug hangtud nga mosangpot kini sa lihok nga makadaut sa kaugalingon ug sa mga tawo naa sa akong palibot."

Mahinungdanon sa pagdumala sa ingon niining kabilangan, matud

ni Sam, ang kolektibong kinabuhi ug pagpuna ug pagpuna sa kaugalingon (PPS). Pinaagi sa regular nga mga panaghisgot sa personal nga kahimtang sa mga kauban, sama sa kaylap ngi ginapraktikang "3 tsek-ap," natabangan ang usa ka may kabilangan sa panghunahuna nga makita ang obhetibong kahimtang, ug mabatukan niini ang mga suhetibong panghunahuna. Sukwahi sa maong proseso ang kasagarang kinabuhi sa syudad nga indibidwalistiko ug walay tinagdanay, kung asa ang adunahan lang ang adunay akses sa untop sa panahon nga atensyong medikal ug *therapy*.

"Apan walay silbi ang mga PPS o konsultasyon kung liberal ka," bawi ni Sam. "Pinakayawe nga bansayon ang kaugalingon nga mahimong matinud-anon, unsa man kadaku ang imong kahadlok nga sayop ang imong gihunahuna o kung unsa ang pagtanaw sa mga kauban. Ang mahinungdanon mao ang proseso sa pagpadayag, tungod kay pinaagi niini, ginatabangan na usab nimo ang mga kauban sa palibot nga masabtan ang imong kahimtang ug mga

Partidong anti-US, nakadaug sa Bolivia

NAKADAUG SA ELEKSYONG gipahigayon niadtong Oktubre 18 sa Bolivia si Luis Arce, kapartido ug kanhing ministro sa ekonomiya sa kanhing presidente sa nasud nga si Evo Morales. Napildi niya si Carlos Mesa, ang kandidatong suportado sa US. Nahimong malinawon ang eleksyon, sukwahi sa pagpanghadlok sa US nga mahimong gubot kini.

Napwersang magluwat sa pwesto si Morales niadtong miaging tuig taliwala sa bangis nga demonstrasyon sa mga grupong gisulsulan sa US. Gipakaylap kanhi sa US nga nanglimbong siya sa eleksyon, usa ka butang nga gipanghimakak sa mga independyenteng imbestigador. Nakita sa mga tigsuporta ni Morales ang pagdaug ni Arce isip pagpildi sa mga pakana sa US ug mga papet niini sa nasud nga kontrolon ang Bolivia. Matud nila, pagpanalipod usab kini sa maki-katawhang mga palisiya ni Morales nga nagbunga sa halos 14 ka tuig nga istabilidad sa nasud.

trigger."

Importante usab nga padayon pang tun-an sa mga rebolusyonaryo ang pagmaneyds sa kabilangan. Adunay manwal nga gisulat ang organo sa panglawas sa Partido Komunista ng Pilipinas nga nagpatinaw sa lain-laing klase sa problema sa panghunahuna, nagpunting sa mga hinungdan niini ug naglatag sa lain-laing pamaagi aron tabangan ang mga kauban ug imaneyds ang kabilangan. Sulod sa Bagong Hukbong Bayan, lakin sa pagbansay sa mga medik ang pagdumala sa MHP, pareho sa han-ay sa mga manggubat ug sa masa.

Mahinungdanon usab ang pagpatuman sa pagbaton sa *stigma* batok niini, ang mga kalambigit niining mga anti-siyentipikong paghunahuna ug ang haum nga pag-amuma sa mga adunay kabilangan.

"Morag anino ang MHP, kanunay siyang anaa kung asa ka modato. Ang pagdumala niini walay kalainan sa pagpaningkamot sa paghulma sa kaugalingon nga kanunay giatubang, ug adlaw-adlaw nga ginabangi sa kaugalingon. ■